

Reglur Þingeyjarsveitar um skólavist barna utan lögheimilissveitarfélags

1. gr.

Reglur þessar eiga eingöngu við þegar einstakir nemendur sækja skóla í öðru sveitarfélagi en þeir eiga lögheimili í. Ef sveitarfélag tekur að sér með reglubundnum hætti að vista nemendur annars sveitarfélags eða ef nemendur annarra sveitarfélaga eru vistaðir með reglubundnum hætti í tilteknum grunnskóla skal sérstaklega samið um greiðslur vegna þess á milli sveitarfélaganna.

Nemendur á grunnskólaaldri stunda að jafnaði nám í því sveitarfélagi þar sem þeir eiga lögheimili. Frá þessu er vikið í eftirfarandi tilvikum:

- Þegar barn flyst í annað sveitarfélag á skólaárinu, sbr. 2. gr.
- Þegar forsjáraðili barns óskar eftir að það fái að stunda nám í grunnskóla utan síns lögheimilissveitarfélags, sbr. 3.- 5. gr.
- Þegar barni er ráðstafað í tíma-bundið fóstur til fósturforeldra sem eiga lögheimili í öðru sveitarfélagi, sbr. 6. gr.

Reglur þessar gilda um samskipti Þingeyjarsveitar við önnur sveitarfélög í ofangreindum tilvikum og vegna þeirra nemenda sem hlut eiga að máli.

2. gr.

Flytjist lögheimili nemanda í annað sveitarfélag eftir að hann hefur byrjað skólagöngu í því sveitarfélagi, sem hann átti lögheimili í fyrir flutning, skal hann eiga rétt á að ljúka námi í þeim skóla sem hann stundaði nám í við flutninginn til loka skólaársins. Að öllu jöfnu getur nemandi ekki sótt skóla í tveimur sveitarfélögum samtímis. Aðstæður nemandans geta hins vegar kallað á að frá þessu sé vikið með sérstöku samkomulagi. Ákvörðun í þessu efni er þó alltaf háð yfirlýstu samþykki beggja sveitarfélaga og að teknu tilliti til hagsmuna nemandans.

Skólavist í öðru sveitarfélagi er tímabundin ráðstöfun og er einungis veitt ef um sérstakar aðstæður er að ræða sem hamla skólasókn nemandans í Þingeyjarsveit. Skal ráðstöfunin endurskoðuð fyrir hvert skólaár. Að jafnaði er hér miðað við að nemandi:

- eigi einungis eftir að ljúka 10. bekk,
- sé barn sem ráðstafað er tímabundið á fósturheimili samkvæmt ákvörðun barnaverndarnefndar

Grundvallist umsókn ekki á neinu framangreindra atriða, skal hún engu að síður metin á málefnalegan hátt, í sveitarstjórn Þingeyjarsveitar, með hagsmuni viðkomandi barns að leiðarljósi. Haft verði í huga að um undantekningu er ræða, verði umsóknin samþykkt. Umsókn skal ávallt berast áður en skólavist hefst.

Samþykki Þingeyjarsveit skólavist barns sem er með lögheimili í öðru sveitarfélagi er það ávallt bundið þeim skilyrðum að:

- a) Umsókn ásamt samþykki lögheimilissveitarfélags liggja fyrir áður en skólavist hefst.
- b) Aðstæður í skóla leyfi tímabundna fjölgun barna.

3. gr.

Forsjáraðili nemanda sem óskað er eftir að fá að stunda nám í grunnskóla utan síns lögheimilissveitarfélags skal senda inn umsókn þess efnis til lögheimilissveitarfélags nemandans fyrir 15. apríl. Í umsókn skal upplýsa um ástæður umsóknarinnar og hvort foreldrar fara sameiginlega með forsjá en eiga ekki sama lögheimili.

Sé umsókninni synjað af lögheimilissveitarfélagi skal henni svarað sem fyrst með rökstuðningi. Hjóti umsóknin jákvæða afgreiðslu hjá lögheimilissveitarfélagi, skal senda hana til þess sveitarfélags þar sem óskað er eftir að nemandinn stundi nám, hér eftir nefnt viðtökusveitarfélag. Verði því við komið skal senda umsókn um skólavist fyrir 10. maí til viðtökusveitarfélags og skal þá svar berast lögheimilissveitarfélagi fyrir 1. júní.

Framangreindar dagsetningar eru meginregla þegar vitað er með löngum fyrirvara um óskir um skólavist utan lögheimilissveitarfélags. Komi óskir fram það seint að ekki er unnt að virða framangreindar dagsetningar skulu aðilar hraða afgreiðslu sem kostur er.

4. gr.

Þegar heimild er veitt skv. 3. gr. til náms í grunnskóla utan lögheimilissveitarfélags, skal samhliða samið um greiðslur en Samband íslenskra sveitarfélaga ákveður sérstakt viðmiðunargjald (sjá skýringar með gjaldskránni hér að neðan). Viðmiðunargjaldið er uppfært árlega og skal gjaldskrá liggja fyrir í síðasta lagi 15. ágúst ár hvert. Sveitarfélög semja sín á milli um fyrirkomulag greiðslna og uppgjör.

Í viðmiðunargjaldi er innifalinn allur skólakostnaður annar en húsnæðiskostnaður og sá viðbótarkostnaður sem sannanlega fellur til vegna nemandans sérstaklega.

Þarfnist nemandi sérstakrar aðstoðar eða aukins stuðnings (t.d. vegna sérfræðiþjónustu, sérstakrar íslenskukennslu innflytjenda o.fl. sem sannarlega telst umfram almennan skólakostnað) skal samið sérstaklega um viðbótargreiðslur um leið og gengið er frá samkomulagi um skólagöngu nemanda milli lögheimilissveitarfélags og viðtökusveitarfélags. Með sama hætti skal semja um aðra liði sem eru sannarlega umfram viðmiðunargjaldið og framlag jöfnunarsjóðs vegna skólaaksturs, ef um það er að ræða. Að öllu jöfnu skal samkomulag um viðbótargjald tekið til endurskoðunar fari annað hvort sveitarfélagið fram á það. Verði ágreiningur um hvort endurskoðun gefi tilefni til breytinga á greiðslum er unnt að vísa ágreiningsefninu til umsagnar sérstakrar nefndar skv. 7. gr.

5. gr.

Í samskiptum sveitarfélaga skal það vera meginreglan að komi fram ósk frá lögheimilissveitarfélagi um skólavist í öðru sveitarfélagi skal orðið við slíkri ósk.

Til þess að auðvelda móttöku nemanda í viðtökusveitarfélagi skulu öll nauðsynleg gögn send milli hlutaðeigandi skóla. Persónuverndarsjónarmiða skal gætt í allri meðferð gagnanna.

Geti skóli/skólar viðkomandi sveitarfélags ekki veitt þeim nemanda, sem óskað er eftir skólavist fyrir, viðunandi þjónustu að mati sérfræðiþjónustu skóla skal slíkt koma fram sem rökstuðningur fyrir synjun á umsókn til lögheimilissveitarfélags.

6. gr.

Sveitarfélagi er skylt samkvæmt grunnskólalögum að sjá til þess að nemandi njóti skólavistar, sem hefur verið ráðstafað í tíma-bundið fóstur til fósturforeldra sem þar eiga lögheimili.

Um greiðslur lögheimilissveitarfélags vegna skólavistar barns í tímabundnu fóstri fer skv. ákvæðum barnaverndarlaga, grunnskólalaga, reglugerð nr. 547/2012 um skólagöngu fósturbarna og gjaldskrá Sambands íslenskra sveitarfélaga, eftir því sem við á

7. gr.

Komi upp ágreiningur um greiðslur eða annað tengt skólavist og sveitarfélögin geta ekki leyst þann ágreining sín á milli, er hægt vísa honum til sérstakrar þriggja manna nefndar til umsagnar. Skilyrði þess að nefndin taki mál til umfjöllunar er að báðir deiluaðilar verði sammála um að vísa því til hennar og að ágreiningur heyri ekki undir annan úrskurðaraðila. Tryggja skal nemandan skólavist þó beðið sé eftir niðurstöðu nefndarinnar en hún skal leitast við að hraða vinnu sinni sem kostur er.

Í nefndinni eiga sæti einn fulltrúi tilnefndur af hvoru sveitarfélagi og einn fulltrúi tilnefndur af sambandinu. Skólamálafulltrúi sambandsins er starfsmaður nefndarinnar.

Þegar nefndin fær mál til umfjöllunar aflar starfsmaður nefndarinnar nauðsynlegra gagna og kannar afstöðu viðkomandi sveitarfélaga til ágreiningsefnisins þ.á.m. hvort grundvöllur sé til sátta milli þeirra. Lýsi bæði sveitarfélögin því yfir að sættir hafi náðst eða samkomulag sé í augsýn getur nefndin lokið meðferð máls á þeim grundvelli. Það kemur þó ekki í veg fyrir að sama ágreiningsefni verði lagt fyrir nefndina á ný ef úrlausn þess gengur ekki eftir.

Sé sáttagrundvöllur ekki fyrir hendi gerir nefndin tillögu til úrlausnar ágreiningsefnisins. Tillagan skal rökstudd og sett fram með skýrum hætti. Tillaga nefndarinnar er ekki bindandi fyrir hlutaðeigandi sveitarfélög.

Samþykkt á 8. fundi fræðslu- og velferðarnefndar þann 15. mars 2023.

Staðfest á 21. fundi sveitarstjórnar Þingeyjarsveitar þann 23. mars 2023.